



**PRAVILNIK O ARBITRAŽI
REGULATORNE KOMISIJE ZA ELEKTRIČNU
ENERGIJU U FEDERACIJI BOSNE I HERCEGOVINE**

Mostar, novembar 2005. godine

Na osnovu članova 14, 15, 31. i 86. stav 4. Zakona o električnoj energiji („Službene novine Federacije Bosne i Hercegovine“ br. 41/02, 24/05 i 38/05), članova 5, 6. i 16. Statuta Regulatorne komisije za električnu energiju u Federaciji Bosne i Hercegovine („Službene novine Federacije Bosne i Hercegovine“ br. 13/04) i člana 51. stav 8. Poslovnika o radu Regulatorne komisije za električnu energiju u Federaciji Bosne i Hercegovine („Službene novine Federacije Bosne i Hercegovine“ br. 59/04), Regulatorna komisija za električnu energiju u Federaciji Bosne i Hercegovine je na XXI. redovnoj sjednici održanoj u Mostaru, dana 22.12.2005. usvojila

PRAVILNIK O ARBITRAŽI REGULATORNE KOMISIJE ZA ELEKTRIČNU ENERGIJU U FEDERACIJI BOSNE I HERCEGOVINE

POGLAVLJE I. OPĆE ODREDBE

Član 1.

(Primjena pravilnika)

Ovim pravilnikom Regulatorna komisija za električnu energiju u Federaciji Bosne i Hercegovine (u daljem tekstu: FERK) uređuje postupak arbitraže u sporovima između imalaca dozvola ili imaoca dozvole i kupca u skladu sa članom 31. Zakona o električnoj energiji.

Član 2.

(Cilj pravilnika)

Cilj donošenja ovog pravilnika je da se osigura transparentan, efikasan i ekonomičan efikasan postupak arbitraže za strane koje postignu poseban sporazum da idu u postupak arbitraže za određene sporove pred FERK-om u skladu sa članom 31. Zakona o električnoj energiji.

Član 3.

(Definicije)

Definicije termina koji se koriste u ovom pravilniku uključujući i one iz Zakona o električnoj energiji u Federaciji Bosne i Hercegovine i Poslovnika o radu Regulatorne komisije za električnu energiju u Federaciji Bosne i Hercegovine (u daljem tekstu: Poslovnik) su slijedeće:

- a) **Arbitraža**“ označava članove FERK-a, kad rješavaju po tužbi u postupku arbitraže.
- b) **„Stranka u postupku“** označava tužioca ili tuženog u postupku arbitraže pred FERK-om,
- c) **„Odgovor na tužbu“** označava podnesak koji podnosi tuženi kao odgovor na tužbu, ili koji podnosi tužilac kao odgovor na protutužbu podignutu od strane tuženog,

- d) „**Tužba**“ označava podnesak kojim se pokreće postupak arbitraže pred FERK-om,
- e) „**Tuženi**“ označava lice protiv kojeg je pokrenuta tužba u postupku arbitraže pred FERK-om
- f) „**Tužilac**“ označava lice koje podnosi tužbu za pokretanje postupka arbitraže pred FERK-om
- g) „**Ugovor o arbitraži**“ označava pisani ugovor za rješavanje sporova u postupku arbitraže pred FERK-om, a koji su nastali između tužioca i tuženog,
- h) „**Zakon**“ označava Zakon o električnoj energiji („Službene novine Federaciji Bosne i Hercegovine“ br. 41/02, 24/05 i 38/05),

POGLAVLJE II. ORGANIZACIJA

Član 4.

(Ostali postupci pred FERK-om)

Arbitražni postupak uređen ovim pravilnikom nema namjeru da ograniči mogućnosti stranki da koriste ostale postupke za rješavanje sporova pred FERK-om u skladu sa članom 51. Poslovnika ako se arbitražni postupak prekine iz bilo kojeg razloga prije završetka istog.

Član 5.

(Arbitraža i voditelj postupka)

- (1) Članovi FERK (u daljem tekstu: Arbitraža) vode postupak arbitraže za koje je nadležan FERK u skladu sa Zakonom.
- (2) FERK može imenovati i odrediti obim ovlaštenja voditelja postupka arbitraže u skladu sa FERK-ovim pravilnicima.
- (3) Voditelj postupka preuzima sve radnje na pripremnoj raspravi i raspravama u postupku arbitraže, do donošenja presude.
- (4) Voditelj postupka o preduzetim radnjama iz stava 3. ovog člana, dostavlja Arbitraži pisani izvještaj koji sadrži: utvrđene činjenice, dokaze kojima potvrđuje te činjenice, zakonske odredbe, troškove postupka, te preporuku presude, a može podnijeti i dodatni usmeni izvještaj na internim sastancima i redovnim sjednicama FERK-a.

POGLAVLJE III. NADLEŽNOST ARBITRAŽE

Član 6.

(Nadležnost)

- (1) Arbitraža je nadležna za sporove između imalaca dozvole ili imaoaca dozvole i kupca u vezi sa:
 - a) pravom na snabdijevanje električnom energijom,
 - b) obavezom snabdijevanja električnom energijom,
 - c) tarifama po kojima se vrši snabdijevanje električnom energijom,
 - d) kašnjenjima ili odbijanjem snabdijevanja električnom energijom

- e) kvalitetom snabdijevanja električnom energijom i pružanjem usluga u vezi s tim.
- (2) Ukoliko su stranke utvrdile poseban ugovor eksplicitno imenujući FERK kao arbitražu spora, te dajući ovlaštenja FERK-u za arbitražu u skladu sa stavom 1. ovog člana, FERK će prihvatiti ovlaštenja u postupku arbitraže.
 - (3) Osnov nadležnosti se navodi u tužbi kojom se pokreće postupak i kopija pisanog ugovora se prilaže uz tužbu.
 - (4) Poseban ugovor o arbitraži može biti:
 - a) Ugovor potpisan od stranki koji obuhvata arbitražnu klauzulu kojom se ugovara arbitraža u slučaju spora ili neki drugi dokument za koji FERK smatra da predstavlja pisani dokaz o sklopljenom ugovoru o arbitraži ili
 - b) Pristanak tužioca i tuženog da FERK sprovodi arbitražu u sporu, a taj pristanak daje razmjenom tužbe u kojoj tužilac navodi postojanje ugovora o arbitraži i odgovora na tužbu u kojem tuženi to ne ospirava.
 - (5) FERK ima pravo da od stranki zahtijeva potpisivanje dodatnog posebnog ugovora kojim se utvrđuju uslovi arbitraže, nakon dostavljanja tužbe i prije početka rasprave po arbitraži, ukoliko FERK utvrdi da bi to moglo ići u prilog arbitražnom postuku.
 - (6) Stranke prihvatanjem nadležnosti Arbitraže, prihvataju i odredbe ovog pravilnika.

Član 7.

(Prigovor nadležnosti)

- (1) Svaki prigovor na nadležnosti FERK-a mora biti pokrenut od strane tuženog u njegovom odgovoru na tužbu.
- (2) Kada se stranke posebno dogovore da će rješavanje sporova povjeriti Arbitraži u skladu sa članom 6. ovog Pravilnika, tada stranke ne mogu podnositi prigovor nadležnosti izuzev u slučaju iz člana 8. stav 4. ovog pravilnika.

Član 8.

(Odlučivanje o prigovoru nadležnosti)

- (1) Arbitraža će pregledati podneske i odlučiti da li FERK ima nadležnost da sprovede arbitražu u sporu prije pripreme rasprave.
- (2) Ukoliko postoji prigovor nadležnosti ili tuženi nije dostavio odgovor na tužbu za arbitražu, Arbitraža razmatra odbacivanje tužbe odnosno povlačenje tužbe.
- (3) FERK može, ukoliko tužitelj povuče tužbu, a na njegov zahtjev, prihvatiti tužbu za arbitražu kao zahtjev za rješenje spora u skladu sa članom 51. FERK-ovog Poslovnika.
- (4) Stranke se obavezne da Arbitraži podnesu dokaz da se pred nadležnim sudom ne vodi spor o istom predmetu.

Član 9.

(Izuzeće Arbitara)

- (1) Stranka može zahtijevati izuzeće arbitra Arbitraže u skladu sa članom 25. i 26. Zakona.
- (2) Arbitar Arbitraže dužan je da se izuzme iz postupka arbitraže u skladu sa članom 25. i 26. Zakona.
- (3) U slučaju izuzeća arbitra Arbitraže u skladu sa ovim pravilnikom:

- a) ako ostane većina arbitara Arbitraže, Arbitraža obavještava stranke, da mogu nastaviti arbitražu pred FERK-om ukoliko se o tome stranke posebno dogovore ili
- b) stranka može tužbom zahtijevati da sud koji bi bio nadležan u prvom stepenu da nije zaključen ugovor o arbitraži, proglasi prestanak važenja ugovora o arbitraži.

POGLAVLJE IV. POKRETANJE ARBITRAŽNOG POSTUPKA

Član 10. (Tužba)

- (1) Arbitražni postupak se pokreće tužbom dostavljenom Arbitraži, u pet primjeraka, koja mora sadržavati:
 - a) naziv i sjedište, odnosno ime, prezime i adresu stranaka,
 - b) izjavu o osnovi za FERK-ovu nadležnost, uključujući kopiju posebnog ugovora o arbitraži ili ostale dokaze na kojima se zasniva nadležnost arbitraže u skladu sa članom 6. ovog Pravilnika,
 - c) predmet i vrijednost spora, činjenično stanje, zahtjeve, dokaze i sve dokumente koji se odnose na predmet spora, u originalu ili u ovjerenom prijepisu,
 - d) izjave o tome je li nastali spor predmet postupka pred sudom,
 - e) dokaz o uplati jednokratne naknade za vođenje postupka arbitraže.
- (2) Arbitraža će odrediti je li zaprimljena tužba u skladu sa stavom 1. ovog člana i o tome će poslati pisano obavještenje podnosiocu tužbe u roku od 30 dana od prijema tužbe.
- (3) Ako je tužba nerazumljiva ili ne sadrži sve što je potrebno da bi se po njoj moglo postupiti (nepotpuna tužba), Arbitraža je podnosiocu vraća radi ispravke ili dopune uz navode šta treba ispraviti ili dopuniti sa navođenjem posljedica ukoliko se ne izvrše ispravke ili dopune i određuje rok za ispravku ili dopunu, koji ne može biti duži od 8 dana.
- (4) Ako tužba bude ispravljena odnosno dopunjena i predata Arbitraži u roku iz stava 3. ovog člana, smatra će se da je podnesena Arbitraži onog dana kad je prvi put podnesena.
- (5) Ako tužba ne bude vraćena Arbitraži u datom roku smatrat će se da je povučena, a ako bude vraćena bez ispravke odnosno dopune, odbacuje se.
- (6) Ukoliko je tužba u skladu sa zahtjevima iz stava 1. ovog člana, tužbu sa priložima Arbitraža dostavlja tuženom na adresu navednu u tužbi, sa uputstvima tuženom da dostavi svoj odgovor do određenog datuma i broja kopija koje trebaju biti dostavljene.

Član 11. (Odgovor na tužbu)

- (1) Arbitraža će utvrditi vremenski rok za podnošenje odgovora na tužbu koji neće biti duži od 30 dana nakon što tuženi zaprimi tužbu od strane Arbitraže.
- (2) Ukoliko Arbitraža utvrdi da je odgovor na tužbu nepotpun ili nejasan, Arbitraža vraća isti tuženom sa pojašnjenjem šta treba ispraviti u roku koji ne može biti duži od 8 dana. Ukoliko tuženi ne dopuni odgovor na tužbu, Arbitraža može primjeniti odredbe člana 8. stav 2. ovog Pravilnika.

- (3) U odgovoru po tužbi tuženi odgovora na navode iz tužbe i iznosi svoja sredstva odbrane.

Član 12.
(Spajanje postupaka)

Ako su stranke pred Arbitražom podnijele jedna protiv druge više tužbi, koje proističu iz raznih sporova iz nadležnosti Arbitraže, Arbitraža će nastojati da se postupci spoje i da o njima odluči u istom postupku, ako je to moguće, radi ekonomičnosti postupka.

Član 13.
(Obavještenje za javnost)

- (1) Ukoliko FERK prihvati nadležnosti nad postupkom arbitraže u skladu sa članom 8. ovog Pravilnika, Arbitraža objavljuje obavještenje za javnost u kome navodi kratak opis predmeta tužbe, naziv tužioca i tuženog, datum održavanja rasprave (ukoliko se ista održava), kao i pojašnjenje da jedino tužilac i tuženi mogu učestvovati kao stranke.
- (2) Obavještenje za javnost se objavljuje u jednom ili više pisanih medija koji izlaze na cijeloj teritoriji Federacije Bosne i Hercegovine i na WEB stranici FERK-a, ne kasnije od osam dana prije dana održavanja rasprave, ili u slučaju da rasprava neće biti održana, osam dana prije održavanja redovne sjednice Arbitraže na kojoj donosi presudu u postupku arbitraže.

Član 14.
(Dostavljanje pismena)

- (1) Kada Arbitraža ili voditelj postupka dostavlja pismena strankama u postupku dostavljanje se vrši putem preporučene pošte.
- (2) Stranka u postupku arbitraže svoja pismena dostavlja drugoj stranci u postupku putem preporučene pošte na ruke o čemu dokaz dostavlja Arbitraži.
- (3) Stranke u postupku arbitraže svoja pismena Arbitraži dostavljaju preporučenom poštom.
- (4) Ako su stranke odredile punomoćnike, svi pozivi i pismena upućuju se na adresu punomoćnika.
- (5) Arbitraža ili voditelj postupka mogu, uz odobravanje stranki, omogućiti alternativne metode dostavljanja podnesaka kako bi se ubrzalo rješenje.

POGLAVLJE V. PRIPREMANJE RASPRAVE

Član 15.
(Zakazivanje pripremne rasprave)

- (1) Arbitraža ili voditelj postupka može zakazati pripremnu raspravu ukoliko utvrdi da će to doprinijeti organizovanju rasprave.
- (2) Pripremna rasprava se održava nakon što FERK utvrdi da ima nadležnost za rješavanje, u pravilu u roku od 30 dana nakon zaprimanja odgovora na tužbu.

Arbitraža ili voditelj postupka, ukoliko je to moguće, konsultuje se sa strankama kako bi se odabrao odgovarajući datum održavanja.

Član 16.

(Tok pripremne rasprave)

- (1) U pozivu za pripremnu raspravu, Arbitraža ili voditelj postupka mogu od stranki zahtijevati da iznesu sve činjenice i propise na kojima zasnivaju svoje zahtjeve i predlože sve dokaze koje žele izvesti u toku postupka, te da na pripremnu raspravu donesu sve isprave i predmete koje žele upotrijebiti kao dokaz. Arbitraža ili voditelj postupka može podsticati stranke da prije održavanja pripremne rasprave postignu dogovor koje će dokaze i činjenice iznositi na pripremljenoj raspravi.
- (2) Tokom pripremne rasprave, Arbitraža ili voditelj postupka raspravlja o pitanjima koja se odnose na smetnje za dalji tok postupka, te uspostavlja plan za budući tok postupka.

Član 17.

(Zakazivanje rasprave)

- (1) Rasprava će se, u pravilu održati najkasnije u roku od 30 dana od dana održavanja pripremne rasprave.
- (2) Ako se procjenjuje da će rasprava trajati duže od jednog dana, Arbitraža ili voditelj postupka će zakazivanje nastavka rasprave odrediti u što kraćem roku.

Član 18.

(Dopunjavanje podnesaka i dokaza)

Prije ili u toku rasprave, Arbitraža ili voditelj postupka mogu zahtijevati da stranke dostave dodatne podneske ili dokaze koji mogu pomoći Arbitraži pri rješavanju spora.

POGLAVLJE VI. RASPRAVA

Član 19.

(Rasprava)

- (1) Rasprava u arbitraži je otvorena za javnost.
- (2) Stranke prisustvuju raspravi lično ili preko ovlaštenog punomoćnika. Ako stranka u sporu ima punomoćnika, Arbitraža ili voditelj postupka može odlučiti da na raspravi bude saslušana i ta stranka lično.
- (3) Na raspravama strankama mogu pomagati njihovi savjetnici.

Član 20.

(Odsustvo stranaka sa rasprave)

- (1) Ako tužilac bez opravdanog razloga ne dođe na raspravu, a bio je uredno pozvan, smatra će se da je povukao tužbu, osim ako se tuženi na raspravi upusti u raspravljanje bez prisustva tužioca.

- (2) Ako na raspravu bez opravdanog razloga ne dođe tuženi, a bio je uredno pozvan, rasprava se može održati bez njegovog prisustva.

Član 21.
(Dokazni postupak)

- (1) Arbitraža ili voditelj postupka odlučuje o izvođenju dokaza na prijedlog stranaka.
- (2) Koje će činjenice uzeti kao dokazane Arbitraža ili voditelj postupka odlučuje na osnovu slobodne ocjene dokaza. Arbitraža ili voditelj postupka će savjesno i brižljivo ocijeniti svaki dokaz posebno i sve dokaze zajedno, što voditelj postupka obrazlaže u svom izvještaju iz člana 27. ovog Pravilnika.
- (3) Stranke su dužne saradivati u izvođenju dokaza i izvršavati sve mjere koje se od njih u tom cilju zahtjevaju. Njihovo odbijanje ili propusti se zapisnički konstatuju.

Član 22.
(Izvođenje pojedinih dokaza)

- (1) Tužilac nosi teret dokazivanja činjenica na kojima se tužba zasniva, a tuženi nosi teret dokazivanja činjenica na kojima zasniva svoj odgovor na tužbu.
- (2) Saslušanje svjedoka i izvođenje drugih dokaza vrši se pred Arbitražom ili voditeljem postupka, po redosljedju, na način da prvo izlaže tužilac, zatim tuženi, poslije čega se izvode drugi dokazi.
- (3) Arbitraža može zatražiti od suda mjesno nadležnog za davanje pravne pomoći da se pred njim izvedu pojedini dokazi koji se pred Arbitražom ne mogu izvesti.

Član 23.
(Radnje u postupku)

- (1) U toku postupka Arbitraža ili voditelj postupka može donositi rješenja o radnjama u postupku koje smatra potrebnim, kao što su: polaganje avansa na ime troškova za vještake i svjedoke, obezbjeđenje dokaza, kao i ostala rješenja o vođenju postupka. Protiv ovih rješenja nije dopuštena posebna žalba.
- (2) Arbitraža može odbiti izvođenje dokaza ukoliko stranke nisu izvršile plaćanje avansa za troškove vještaka i svjedoka.
- (3) Arbitraža ili voditelj postupka može u toku postupka naložiti strankama da preduzmu određene radnje ili da se uzdrže od izvjesnih radnji koje se odnose na predmet spora.

Član 24.
(Rokovi)

- (1) Svi rokovi utvrđeni ovim pravilnikom mogu se produžiti na zahtjev stranaka iz opravdanih razloga i po odluci Arbitraže ili voditelja postupka.
- (2) Prilikom razmatranja produženja rokova, Arbitraža ili voditelj postupka vodi računa da se postupak nepotrebno ne odugovlači.

Član 25.
(Zapisnici)

- (1) Zapisnik se vodi o svim radnjama preduzetim u arbitražnom postupku.
- (2) U Zapisnik se pored podataka iz stava (1) ovog člana unosi i :

- a) naziv i sastav Arbitraže, odnosno ime voditelja postupka,
 - b) mjesto gdje se obavlja radnja, dan i sat kad se obavlja radnja,
 - c) naznaka predmeta spora i imena prisutnih stranaka, odnosno trećih lica i njihovih punomoćnika i savjetnika.
- (3) Zapisnik, pored zapisničara i arbitara Arbitraže ili voditelja postupka potpisuju i prisutne stranke, odnosno njihovi punomoćnici.

POGLAVLJE VII. DONOŠENJE ODLUKE

Član 26. (Vrste odluka)

- (1) Nakon što razmotri izvještaj voditelja postupka i zapisnik arbitražnog postupka, Arbitraža donosi presudu.
- (2) Arbitraža može donijeti presudu po pravičnosti samo ako su joj stranke izričito dale takvo ovlaštenje.
- (3) U toku arbitražnog postupka Arbitraža odnosno voditelj postupka o radnjama poduzetim u postupku odlučuje rješenjem.

Član 27. (Izvještaj voditelja postupka)

Voditelj postupka predaje svoj izvještaj strankama, koje mogu, u okviru roka utvrđenog od strane voditelja postupka, dostaviti svoje komentare na izvještaj voditelja postupka i isti se podnose Arbitraži zajedno sa izvještajem voditelja postupka, a prije donošenja presude.

Član 28. (Rok za donošenje presude)

Presuda će biti donesena na redovnoj sjednici Arbitraže, u pravilu, u roku ne dužem od 30 dana od dana zaključenja rasprave.

Član 29. (Način odlučivanja)

- (1) Arbitraža svoju presudu donosi većinom glasova na redovnoj sjednici FERK-a.
- (2) Ako se ne može postići većina potrebnih glasova, Arbitraža je dužna o tome obavijestiti stranke.
- (3) U slučaju nemogućnosti da se presuda donese većinom glasova u skladu sa stavom 2. ovog člana, svaka stranka može tužbom zahtijevati da sud, iz člana 35. stav 1. ovog pravilnika, izrekne prestanak važenja ugovora o arbitraži.

Član 30. (Sadržaj presude)

- (1) Presuda će biti u pisanoj formi i sadržavati će datum te mjesto donošenja iste, imena arbitara Arbitraže, imena (nazive) stranaka, predmet spora, dispozitiv, obrazloženje u

kojem se navodi činjenična i pravna osnova presude, te rok u kome se presuda mora izvršiti. Dužinu ovog roka Arbitraže utvrđuje u zavisnosti od okolnosti slučaja.

- (2) Presudom će se raspodjeliti troškovi postupka ne jednu ili više stranaka.
- (3) Presuda se objavljuje na način predviđen FERK-ovim pravilima.

Član 31.

(Potpisivanje presude)

- (1) Original presude i sve prijepise potpisuju svi arbitri Arbitraže.
- (2) Presuda je važeća ukoliko je potpisana od većine arbitara. Na presudi se konstatira uskraćivanje potpisa arbitra Arbitraže koji je uskratilo svoj potpis. Arbitar čije se mišljenje razlikuje od većine članova Arbitraže može, po njegovoj ili njenoj vlastitoj odluci, podnijeti svoj stav.

Član 32.

(Pravomoćnost presude)

- (1) Presuda Arbitraže ima prema strankama snagu pravomoćne presude.
- (2) Prihvatanjem nadležnosti Arbitraže stranke su prihvatile i obavezu izvršenja presude.
- (3) Stranke mogu, u roku od 15 dana od prijema presude, zatražiti od Arbitraže da ispravi u presudi moguće računске, tipografske ili druge greške u pisanju ili neke slične greške. U ovom roku Arbitraža može na svoju inicijativu vršiti ispravke ovih grešaka.

Član 33.

(Donošenje presude bez održavanja rasprave)

- (1) Ako Arbitraža utvrdi da su pismeni podnesci i dokazi dovoljni za donošenje arbitražne presude i bez održavanja rasprave, i ako niti jedna od stranaka nije zahtjevala održavanje rasprave, Arbitraža može donijeti presudu na osnovu podnijetih pisanih dokaza.
- (2) Arbitraža će obavijestiti stranke da presuda može biti donesena bez održavanje rasprave, te će im ponuditi mogućnost da zahtjevaju raspravu, ili podnesu komentare ili predstave nove činjenice ili dokaze prije donošenja presude.
- (3) Ako niti jedna stranka u roku od 15 dana od prijema obavještenja iz stava 2. ovog člana ne zahtjeva raspravu, Arbitraža može donijeti presudu bez održavanja rasprave.
- (4) Stranke mogu sporazumno podnijeti prijedlog da se presuda donese bez održavanja rasprave.

Član 34.

(Poravnanje)

- (1) Stranke imaju pravo u toku cijelog postupka, riješiti spor poravnanjem, osim poravnanja koja su protivna prinudnim propisima.
- (2) Poravnanje je zaključeno kad stranke poslije pročitanoг zapisnika o poravnanju potpišu zapisnik.
- (3) Zaključeno poravnanje ima snagu izvršnog naslova.

Član 35.
(Dostavljanje presude strankama)

- (1) Strankama se dostavljaju prepisi presude preko suda koji bi bio nadležan u prvom stepenu da nije zaključen ugovor o arbitraži.
- (2) Original presude i potvrda o obavljenoj dostavi čuvaju se kod suda koji je izvršio dostavu presude.
- (3) Na zahtjev stranke sud iz stava 1. ovog člana staviti će na prepisu presude potvrdu o pravomoćnosti i izvršnosti.

POGLAVLJE VIII. TROŠKOVI ARBITRAŽE

Član 36.
(Odlučivanje o nastalim troškovima u postupku arbitraže)

- (1) Visinu jednokratne naknade za vođenje postupka arbitraže utvrđuje FERK u posebnoj odluci koju objavljuje u Službenim novinama Federacije Bosne i Hercegovine.
- (2) Tokom rasprave, Arbitraža ima nadležnost da između stranki rasporedi odgovornost pokriva troškova vezanih za raspravu, te da zahtjeva plaćanje unaprijed tih troškova Arbitraži ili direktno drugim strankama.
- (3) U svojoj presudi Arbitraža će odrediti da stranka koja je izgubila spor snosi sve troškove arbitražnog postupka. Ukoliko je stranka samo djelomično izgubila spor tokom postupka arbitraže, tada će arbitraža odlučiti o troškovima postupka raspoređujući ih između stranaka s obzirom na postignuti uspjeh stranki u postupku.

POGLAVLJE IX. VANREDNI POSTUPCI

Član 37.
(Postupak u vanrednim okolnostima)

Ukoliko FERK utvrdi da postoji neposredna opasnost po život, imovinu i opštu sigurnost u skladu sa standardima navedenim u članu 14. FERK-ovog Poslovnika, FERK može izbjeći obavještenje o postupku, te skratiti sve postupke utvrđene ovim pravilnikom kako bi zaštitio život, imovinu i opću sigurnost. FERK mora utvrditi vanrednost o čemu će obavijestiti javnost. FERK može na vanrednoj sjednici donijeti djelomičnu arbitražnu presudu koja može biti privremena ukoliko je to potrebno radi hitnosti rješenja predmeta arbitraže kako bi se odgovorilo na vanrednu situaciju. Konačnu odluku Arbitraža će donijeti po standardnoj proceduri, nakon prestanka vanrednih okolnosti.

POGLAVLJE X. PRELAZNE I ZAVRŠNE ODREDBE

Član 38. (Tumačenje)

Tumačenje odredbi ovog pravilnika daje FERK.

Član 39. (Stupanje na snagu)

Ovaj pravilnik stupa na snagu osmog dana od dana objavljivanja u „Službenim novinama Federacije Bosne i Hercegovine“.

**Predsjednik FERK-a
Risto Mandrapa ,dipl.ing.**

**Datum:22.12.2005.godine
Broj: 05-07-873-02/05**

SADRŽAJ PRAVILNIKA

POGLAVLJE I. OPĆE ODREDBE.....	1
Član 1.....	1
(Primjena pravilnika).....	1
Član 2.....	1
(Cilj pravilnika).....	1
Član 3.....	1
(Definicije).....	1
POGLAVLJE II. ORGANIZACIJA.....	2
Član 4.....	2
(Ostali postupci pred FERK-om).....	2
Član 5.....	2
(Arbitraža i voditelj postupka).....	2
POGLAVLJE III. NADLEŽNOST ARBITRAŽE.....	2
Član 6.....	2
(Nadležnost).....	2
Član 7.....	3
(Prigovor nadležnosti).....	3
Član 8.....	3
(Odlučivanje o prigovoru nadležnosti).....	3
Član 9.....	3
(Izuzeće Arbitara).....	3
POGLAVLJE IV. POKRETANJE ARBITRAŽNOG POSTUPKA.....	4
Član 10.....	4
(Tužba).....	4
Član 11.....	4
(Odgovor na tužbu).....	4
Član 12.....	5
(Spajanje postupaka).....	5
Član 13.....	5
(Obavještenje za javnost).....	5
Član 14.....	5
(Dostavljanje pismena).....	5
POGLAVLJE V. PRIPREMANJE RASPRAVE.....	5
Član 15.....	5
(Zakazivanje pripremne rasprave).....	5
Član 16.....	6
(Tok pripremne rasprave).....	6
Član 17.....	6
(Zakazivanje rasprave).....	6
Član 18.....	6
(Dopunjavanje podnesaka i dokaza).....	6
POGLAVLJE VI. RASPRAVA.....	6
Član 19.....	6

(Rasprava).....	6
Član 20.....	6
(Odsustvo stranaka sa rasprave).....	6
Član 21.....	7
(Dokazni postupak).....	7
Član 22.....	7
(Izvođenje pojedinih dokaza).....	7
Član 23.....	7
(Radnje u postupku).....	7
Član 24.....	7
(Rokovi).....	7
Član 25.....	7
(Zapisnici).....	7
POGLAVLJE VII. DONOŠENJE ODLUKE.....	8
Član 26.....	8
(Vrste odluka).....	8
Član 27.....	8
(Izveštaj voditelja postupka).....	8
Član 28.....	8
(Rok za donošenje presude).....	8
Član 29.....	8
(Način odlučivanja).....	8
Član 30.....	8
(Sadržaj presude).....	8
Član 31.....	9
(Potpisivanje presude).....	9
Član 32.....	9
(Pravomoćnost presude).....	9
Član 33.....	9
(Donošenje presude bez održavanja rasprave).....	9
Član 34.....	9
(Poravnanje).....	9
Član 35.....	10
(Dostavljanje presude strankama).....	10
POGLAVLJE VIII. TROŠKOVI ARBITRAŽE.....	10
Član 36.....	10
(Odlučivanje o nastalim troškovima u postupku arbitraže).....	10
POGLAVLJE IX. VANREDNI POSTUPCI.....	10
Član 37.....	10
(Postupak u vanrednim okolnostima).....	10
POGLAVLJE X. PRELAZNE I ZAVRŠNE ODREDBE.....	11
Član 38.....	11
(Tumačenje).....	11
Član 39.....	11
(Stupanje na snagu).....	11